

NEWSPAPER CLIPPING

Date	5 Januari 2012 (Khamis)
Title	23 Pelajar Terima Biasiswa Powerteck
Publication	Varsiti – Berita Harian
Page	M/S 8



“Sebagai warga korporat bertanggungjawab, kami komited melaksanakan bantuan berbentuk biasiswa untuk kebaikan masyarakat terutama golongan belia yang ingin melanjutkan pengajian melalui pelbagai program bantuan pendidikan”

Dr Ong Peng Su
Pengarah Eksekutif Powertek



“Melalui pembabitan bersama Powertek selepas ini, saya berharap diberi peluang untuk menyumbang sesuatu yang positif kepada negara satu hari nanti”

Suhairulazan Saman
Penerima biasiswa

BERITA HARIAN



PELAJAR yang menerima biasiswa bergambar bersama Peter dan Dr Ong pada Majlis Tanjong Energy Scholarship Awards (TESA) di Hotel Maya.

Oleh Nas Norziela Nasbah
nasnorziela@bharian.com.my

23 pelajar terima biasiswa Powertek

INISIATIF tanggungjawab sosial korporat (CSR) tidak tertumpu hanya kepada sumbangan berbentuk material, sebaliknya turut meliputi kebajikan bantuan kewangan dalam pembiayaan yuran pengajian bagi mereka yang berada di institusi pengajian tinggi (IPT).

Menyedari hakikat itu, Powertek Berhad (Powertek) tidak ketinggalan untuk menyumbangkan biasiswa bernilai hampir RM1 juta kepada 23 pelajar yang layak menerima bantuan itu melalui program sulung Anugerah Biasiswa Tanjong Energy 2011 (TESA).

Pengarah Eksekutifnya, Dr Ong Peng Su, berkata biasiswa diberikan itu adalah inisiatif tanggungjawab sosial korporat pihaknya dalam bidang pendidikan.

“Sebagai warga korporat bertanggungjawab, kami komited melaksanakan bantuan berbentuk biasiswa untuk kebaikan masyarakat terutama golongan belia yang ingin melanjutkan pengajian melalui pelbagai program

bantuan pendidikan.

“Kami percaya dengan TESA, Powertek dapat memainkan peranan utama dengan menawarkan peluang pendidikan kepada pelajar yang cemerlang. Sebahagian daripada penerima juga kurang berkemampuan dan di sinilah tugas Powertek dalam menyalurkan bantuan biasiswa sehingga mereka tamat pengajian,” katanya ketika ditemui dalam majlis penyampaian sumbangan biasiswa itu di Kuala Lumpur, baru-baru ini.

Majlis penyampaian biasiswa yang disempurnakan oleh Menteri Tenaga, Teknologi Hijau dan Air, Datuk Seri Peter Chin itu menyaksikan 23 pelajar menerima TESA dan 44 penerima Anugerah Buku.

TESA ialah inisiatif CSR syarikat itu yang menggabungkan dua program

biasiswa iaitu Anugerah Biasiswa Powertek dan Anugerah Biasiswa Tanjong yang dibuka kepada pelajar Malaysia dengan tujuan melanjutkan pengajian mereka di Universiti Tenaga Nasional (UNITEN) dan juga universiti awam lain.

Dr Ong berkata, TESA tidak mengenakan syarat atau sekatan dari segi kursus pengajian kerana pelajar boleh mengikuti apa-apa jurusan pilihan masing-masing.

“Penerima terpilih ialah generasi muda yang menjadi aset paling berharga negara dan bakal memimpin terutama dalam pertumbuhan ekonomi negara.

“Biasiswa ini ialah sokongan moral terbaik dalam memastikan mereka dapat mencapai cita-cita selain usaha seseorang itu sendiri,” katanya.

Sementara itu, Suhairulazan

Saman, 18, antara penerima biasiswa itu ketika ditemui berkata TESA banyak membantu beliau sepanjang pengajian sebagai pelajar Asasi Kejuruteraan Elektrikal di UNITEN.

Beliau yang berasal dari Perlis, melahirkan rasa gembira dan bersyukur kepada Powertek atas sumbangan biasiswa sepanjang lima tahun beliau menyambung pengajian di UNITEN.

“Dengan adanya bantuan biasiswa ini saya berjanji akan belajar bersungguh-sungguh dan cuba lakukan terbaik selain menggalas tanggungjawab sebagai anak Malaysia.

“Melalui pembabitan bersama Powertek selepas ini, saya berharap diberi peluang untuk menyumbang sesuatu yang positif kepada negara satu hari nanti,” katanya.